

四庫全書

子部

欽定四庫全書

居易錄卷二十五

刑部尚書王士禎撰

蘇子美與梅聖俞齊名永叔稱之曰蘇梅且云子美筆力豪雋以超邁橫絕為奇聖俞覃思精微以深遠閒澹為意雖善論者不能優劣也梅集蘇集予家皆有之聖俞詩實勝子美然子美有言平生不幸寫字被人比周越作詩比梅堯臣此言妄矣文士相輕習氣自古而然錢思公留守西京與謝希深尹師魯歐陽永叔日游宴

賦詩思公遷隨州諸公送之出涕王文康曙繼之頗以
職事相苦一日府會語及寇萊公曙云云永叔執笏起
對曰萊公之責正由老不知退耳曙默然澠水燕談乃
謂是思公事何其乖反

王安石嘗三謁周茂叔皆拒而不見安石恚曰吾獨不
能求之六經乎遂不復見茂叔知人與蘇明允同然使
不峻拒之使變化氣質未必不為良臣即不然亦未必
禍天下若斯之烈也鶴林玉露嘗深惜之以為此有天

意

宋人如章惇最工書其論書亦最精自謂墨禪黃長睿亦謂其筆勢超超意出諸薛然後人不屑道蔡京亦然脫有存者賞鑒家亦罕收藏不中作蘇黃奴隸是故君子惡居下流此之謂也

蕭相國封鄼鄼二音一音贊者在南陽一音嵯者在沛班孟堅泗水亭銘云文昌四友漢有蕭何序功第一就封於鄼孟堅漢人本朝故事必不誤且相國沛人自合

封沛舍沛之鄼而遠食南陽之鄼安所取乎而王楸野
客叢書據唐書劉晏傳釋文以馭孟堅之非且歷引楊
巨源姚合賈島諸人詩作嵯字用者以為皆誤謬矣按
劉肅大唐新語云蕭何封鄼侯先儒及師古以為南陽
筑陽之城筑陽今屬襄州竊以封功臣當就本土張良
封留是為成例何須穿鑿更制別音此言得之矣七修
類稿云沛國者何始封邑南陽者何子孫所封

子向以韓吏部送李愿序愿即西平王長子而馭李濂

嵩渚集疑愿唐書無傳之誤適見閻若璩博湖掌錄一
則辨此李愿别是一人其略云按昌黎年譜貞元十七
年公在京師是年有送李愿歸盤谷序觀稱愿之言蓋
終其身官不挂朝籍者安得有如唐書李愿傳所載云
云乎其别為一人一也退之有盧郎中寄示送盤谷子
詩二章和歌首云昔尋李愿向盤谷當又在貞元八年
退之未第之前故得入太行訪隱淪是時西平尚在愿
安得輒隱於此二也和歌又云開緘忽覩送歸作字向

紙上皆軒昂又知李侯竟不顧方冬獨入崔嵬藏則知
序作於是年冬蓋愿嘗隱盤谷茲來遊長安不得志故
序曰送歸豈如傳所稱勳閥乎三也貞元中濟源令刻
此序盤谷石上後書云昌黎韓愈知名士也高愿之賢
故序而送之此當時目擊其事者僅稱之曰賢無一語
鋪張其人地四也李愿傳晟立功時諸子未官宰相以
聞即日召授太子賓客上柱國考晟傳廣德初擊党項
有功即所謂立功時也下距貞元辛巳愿已歷宦三十

九年矣安得如序所云五也退之貞元辛巳冬尚在京
師叅調明年始授四門博士唐人最重爵安敢與歷官
三十九年者雁行曰友人某六也愿傳邇聲色而政衰
又云結納權近官貨隨賂遺輒盡其人如是安能吐高
論俾退之聞而壯之七也西平洮州臨潭人貞元七年
辛未以臨洮未復請附貫萬年詔可是愿當為長安人
安得於濟源之盤谷曰歸乎八也右詞甚辨予北征日
紀云云亦已疎矣故備著之

宋人兩張先皆字子野人往往不能辨前卷已各詳其

履歷然未有如道山清話之訛舛者道山云張先京師

人有文章尤長於詩詞人目為張三影

又號三中此官都官郎中居湖

州者年八十餘尚無恙

以三影為京師人已誤其下又云其祖母

宋氏孝章皇后妹也子野生貴家刻苦過於寒儒取高

科甫改秩為鹿邑縣以殂歐陽永叔雅敬重之云云今

人乃以張三影呼之哀哉歐陽為其墓銘

此戚里官鹿邑縣者年四

十八卒不號三影

觀此則曾參秋胡之誤又何怪乎又按湖州

張子野年八十五尚買妾東坡贈詩云詩人老去鶯鶯
在公子歸來燕燕忙早年有一叢花詞云不如桃杏猶
得嫁東風歐陽公稱為桃李嫁東風郎中見范公稱過
庭錄知兩張子野皆從歐公遊也

今小說演義記貝州王則事其中人亦多有依據如馬
遂擊賊被殺是也其云成都神醫嚴三點者江西人能
以三指間知六脉之受病以是得名見癸辛雜識

張含愈光題頴公祠云野老爭傳傅頴川當時功業冠

南滇平蠻壁壘蒼山外破鹵旌旗白石邊祇見荒祠通
落日不聞遺像照凌烟陰風古樹無窮恨長為英雄吊
九泉蓋滇人之思潁公猶蜀人之思忠武也

處子賤碑云濟南伏生即子賤之後處與伏古通用見

趙彥衛雲麓漫鈔

又云子賤
處義之後

活字板起於畢昇昇宋時人

桐城友人姚文燮字經三順治己亥進士詩畫皆有名
年六十餘忽病不識字即其姓名亦不自知醫不知為

何症也竟以是終按夢溪筆談記松滋令姜愚者忽不識字者數年後稍稍復舊信奇疾也

墨莊漫錄載明州士人陳生泛海至一地曰天宮之院堂上有老人據牀坐左右白袍烏巾者三百餘人云云老人唐相裴休也山中生人獲甚大多如人形陳欲乞數本老人曰此物鬼神所護惜持歸經涉海洋恐貽禍也山中良金美玉皆至寶任爾取之又云楞嚴經心地之本當循習之時元祐間也因錄人參事記於

此

姑蘇志古蹟類滄浪亭之後載梅都官園引祝樵野錄
云聖俞晚年謝事卜築滄浪之旁與子美為鄰云云按
歐陽文忠作聖俞墓誌及集序初無晚年謝事卜居蘇
州之文但云累官至尚書都官員外郎命編修唐書書
成未奏而卒年五十有九其卒在京師亦未嘗謝事也
小說之妄如此王文恪顧取之何也

印本書始於五代諸家之說皆然惟陸文裕燕閒錄云

隋文帝開皇十三年十二月八日勅廢象遺經悉令雕
撰此印書之始予詳其文義蓋雕者乃像撰者乃經儼
山連讀之悞耳

王安石子雱云君子多喜食酸小人多喜食鹹蓋酸得
木性而上鹹得水性而下也右見青箱雜記六月九日
雨中觀此語不覺失笑或問之予曰安石變法引用呂
惠卿曾布等一輩小人想皆用鹹醬試過若韓富司馬
諸公直是呷得三斗醋故安石讐之不遺餘力耳座中

失笑

後唐裴尚書年老致政其門生馬裔孫知舉放榜後引諸進士謁謝裴賦詩云三主禮闈今八十門生門下見門生按此即今榜下引見之禮然門生門下見門生今詞林相隔僅兩科即已有之不足異也

却掃編言宋文臣起復必先授武官蓋用墨線從戎之義示不得已也故富文忠公以宰相丁憂起復初授冠軍大將軍餘官皆授雲麾將軍是以明知奪情起復之

非也明初猶沿此習雖宋楊蹇夏諸名臣不能免特不授武職耳

本朝雖提督總兵官槩令丁憂其或邊疆要地令在任守制者必出

特旨

孝治過宋明遠哉

老學菴筆記張文潛言王中父詩好用助語又記韓少師持國詩數聯如用舍時焉耳窮通命也歟之類明啓

禎間尚竟陵詩多用助語世以為口實然古名輩先已
有之

筆記司馬文正公五字詩云烟曲香尋篆杯深酒過花
可謂工麗此與文忠烈趙清獻詩擬西崑相似也

坡公與殿帥姚麟相詭云傳語本官今日斷屠故人戲
以坡書為換羊書然麟亦武臣中之錚錚者春渚紀聞
記其二事云王介甫當國一日折柬召麟麟不往裕陵
知而詢之麟對曰臣職掌禁旅宰相非時以片紙召臣

臣不知其意故不敢往又有言麟馭下嚴者裕陵亦因
事勵之對曰誠如聖訓然臣自行列蒙陛下拔擢使掌
衛兵於殿庭之間豈當以私恩結下為身計耶裕陵皆
善之據此二事其為坡公之友無愧矣按麟關中人世
稱姚硬弓家陸放翁云

茅亭客話記蜀處士滕昌祐種荷竹法錄於此埋一大
盆拌土令細切生葱酒糟各少許深二尺餘以水漬之
候春初掘取藕根麤者和顛三節已上四五莖埋入深

泥令近盆底才及春分葉生當年有花移竹以八月
社前後先掘地坑令寬大以水調細土作稀泥即掘
竹四面鑿斷大根科連根以繩綯定昇時勿令動著
根鬚間土昇入坑致泥漿中令泥漿周布徧滿乃東
西搖之復南北搖之令泥漿入至鬚間便以細土覆之
勿令土壅過竹本根也若竹稍長者芟去顛葉纏竹架
之恐風搖動即不活每窠相去二尺餘不須實斫只以
一脚踏之來年生筍速也宜於園東北軟土種之根勿

頻澆水水多則肥死

按蜀地入秋多陰雨故種竹宜八月耳他處仍以五六月伏雨時為

宜竹性西南行故曰東北

又栽果法以冬至後立春前斫美果直枝

須有鴈膝大如拇指者長二尺以來劄於芋魁中掘土令寬調泥漿細切生葱一升許攪於泥中將芋置泥中以細土覆之勿令豎即當年有花來年結實絕勝種核也

坡詩胡椒鉢兩多安用八百斛然建炎初籍王黼家黃雀鮓乃至八十畝童貫家剽成理中凡至八百斤

弇州朝野異聞錄載籍沒嚴嵩家有珊瑚樹六十株
玻璃瑪瑙水晶珊瑚哥柴官汝窑象牙瑇瑁檀香等
器三千五百五十六件沈香五千五十八斤空青四
枚古銅龍耳等鼎犧樽獅象寶鴨等爐一千一百二
十七件大理石倭金等屏風一百八座金徽玉軫等
古琴五十四張二王懷素歐虞褚蘇黃米蔡趙孟頫
等墨蹟三百五十八冊王維小李將軍吳道子等清
明上河海天落照長江萬里南岳朝元等古名畫三

千二百卷冊宋版書籍六千八百五十三部軸大理
石牀十六張雜嵌螺鈿瑪瑙瑇瑁等牀六百七十五
張倭刀兵器三百四十一件象牙瑇瑁等鑲嵌箏琵琶
絃子樂器八十件紫礦白礦三百九十五兩辰砂
二百五十斤羊脂白玉碧玉黑玉等帶二百二條金
龍壺杯盤等三千五百八件紅玉杯漢始建國元年
注水扈白玉永和鎮宅世寶杯盤玉屏風玉山玉船
玉盆玉佛玉人玉馬玉斗玉珮玉爐玉壺玉瓢玉盃

玉杯玉版玉節等八百五十七件黃金三萬二千九百兩有奇白金二百二萬七千兩有奇他物稱是籍沒朱寧黃金十萬五千兩白金四百九十八萬兩碎

金四箱銀十櫃玉帶二千五百束織金仙鶴二對螺

鈿屏風五十座大理石屏風三十三座胡椒三千五

十石

此物已什倍元載矣

蘇木七十三扛祖母綠佛像一尊白

玉琴琵琶各一金船二古畫四十扛古銅器五十扛

銅獅子四百車古銅爐八百三十座巧石八十扛他

物稱是殆又過前代矣世蕃又有金絲帳金溺器人雙
陸之屬

京師見倪元鎮小畫

古木竹石

有余銓題云三春雷雨蒼龍角

萬里雲霄翠鳳毛
怪得君家圖畫裏
虛窻涼月夜蕭騷
唐肅云木客夜吟秋露翻山空無人石榻寒不似君家
子午谷雲旗畫下玄都壇高弭志云蒼然古木石巖
幽移得江南一段秋共說倪君知籀法數竿瀟灑更風
流醉樵云斷劍故留碧錯刀終有神波陀歲寒意不似

醉時真王璠云流光冉冉逐驚波文物空思晉永和遼
鶴重尋舊城郭當時風致已無多又于思緝盧充賴
二詩不具錄倪畫甚蒼秀諸人字畫亦多工皆元末人
也

張中丞南溟

鵬

修小清河自作濬河議謂白雲湖在長

山縣非也按白雲湖在章丘縣距長山尚百里李中麓
云章丘西北有湖名白雲湖東接清河諸山七十二峪
西灌鵝女溝七十二渠谿谷縷注衆水渚而為湖白雲

英英出其中湖因以名其水入大清與小清無涉不知南溟何據而云然

廬山白鹿洞隔溪有古松大幾十圍松半枝節間生竹一叢僅三尺許安中丞命工圖之此與湖南松上寄生蘭同

山谷甥徐師川洪龜父輩人皆知之呂居仁紫微詩話記楊道孚克一張文潛之甥少有才思為舅所知元符

初榮陽公

呂希哲

謫居歷陽道孚為州法曹掾嘗從出遊

以職事遽歸遺公詩云雨綠霜紅郭外田山濃水澹欲
寒天參軍抱病陪清賞一檄呼歸亦可憐此詩之妙不
減徐洪也道字極喜李義山詩嫦娥應悔偷靈藥碧海
清天夜夜心以為作詩當如此學亦居仁云又石林詩
話記吳縣主簿寇國寶一絕云黃葉西陂水漫流蘆篠
風急滯扁舟夕陽暝色來千里人語雞聲共一丘又云
寇徐州人久從陳無已學此詩尤佳從蘇黃門庭中來
固自不同正石林所云文字淵源有所自來亦不難辨

也豫章別集有題道字畫竹所謂人物英秀有外家風氣者即克一也

左先生蘿石有古辣水詩一篇予在揚州日通州有老布衣古姓者自號古辣泉初未詳其義云何辟寒錄云古辣本賓橫間墟名以墟中之泉釀酒埋之地中日足取出名古辣泉予同年孟縣薛理丞大武奮生自號老峯按薛老峯乃嵩山之峯名也

郎瑛七修類稿言魏有邯鄲淳所書三體石經恐訛淳

乃漢順帝時人作曹娥碑至魏文時已百數十年矣或
鍾繇梁鵠等書耳云云予按陳壽魏志邯鄲淳與王粲
同傳云淳一名竺字子叔潁川人博學有文章又善蒼
雅蟲篆許氏字指黃初初為博士給事中張懷瓘書斷
云梁鵠書受法於師宜官時邯鄲淳亦得次仲法淳宜
小字鵠宜大字又云八體悉工尤精古文大篆八分隸
書淳師曹喜韋誕師淳而不及羊欣采能書人名云陳
留邯鄲淳為魏臨淄侯文學得次仲法名在鵠後其為

魏人昭昭如此瑛素號精核而有此誤亦可見著書考古之難也

六月十五日

欽賜滿漢大學士滿尚書及滿掌院學士等

御筆大學士伊桑阿曰光贊堂阿蘭泰曰容德堂王熙曰曲江風度張玉書曰光輔尚書吏庫勒納冰鑑堂戶馬奇九式經邦兵索諾和崇志堂刑圖納詳慎工薩木哈存誠堂掌翰林院吏部侍郎常書曰掌絲綸

六月二十一日

世廟安懿妃薨公侯伯以下滿漢文武官員赴裕親王府齊集是日

皇太后與

上車駕親臨妃裕親王生母也

梁庾肩吾書品今汲古閣刊本下之上凡二十人而列魏徵第三注元成二字於下譌謬極矣惜不得古本正也

李川父

濂

撰祥符人物志倣名臣言行錄例子久訪西

亭灌甫王孫中州人物志不可得此亦買王得羊也川
父正德癸酉解元甲戌進士與李空同同時所著嵩渚
集最傳川父自號嵩渚山人按嵩渚山在滎陽縣東南
一名小隄山非中岳也

上諭諭兵部湖廣提督徐治都勞績懋著前孫思克施
琅俱授將軍徐治都亦應授為將軍欽此該部請

旨徐治都著授為鎮平將軍治都宿素名將捍蜀寇平

夏逆屢有大功其夫人某氏死彘陵甚烈軍政有

旨問九卿各直省提鎮孰優予在班行曾極推孫徐二
公蓋所聞於公論如此今二公果奉

特旨進位將軍仰見

皇上知人之明懋功之賞必當乎人心若此

命禮部尚書掌翰林院事張英戶部右侍郎王士禎內
閣學士王揆陸某為纂修類函總裁官翰林官

欽點分纂四十人

神仙傳多誕妄無稽即吾儒所常稱說者可例其餘如
言焦先年一百七十歲河上公對漢文帝言吾注道德
經以來一千七百餘年墨子得地仙漢武帝時遣使東
帛加璧以聘墨子墨子不出孔安國事越相范蠡年三
百歲色如童子張志和與顏魯公遊平望鋪一席於水
面揮手上昇又言孫登忤太傅楊駿駿錄之不放去登
乃卒死駿埋之於振橋後數日有人見登在董馬坡之
類夫蘇門先生誠嵇叔夜以才多識寡難乎免於今世

云云故叔夜詩云遠慙柳下近愧孫登今乃謂駿使傳致登遺之布袍登借刀斷袍上下異處置駿門下復斫碎之時謂為狂豈以公和之葆光晦曜而為此兒戲以賈禍哉其妄大抵如此可一笑也

楊升菴先生在滇有張半谷含輩從遊時謂楊門六學士以比黃秦晁張諸人半谷即愈光餘則楊弘山士雲王純菴廷表胡在軒廷祿李中溪元陽唐池南錡又有吳高河懋為七子以擬廖明略升菴謂七子文藻皆在

滇南一時盛事是也按朱曰藩射陂集人日草堂詩引
云升菴先生在江陽以畫像寄余白下揭於寓齋日夕
虔奉如在函丈嘉靖己未人日西域金大輿東海何良
俊吳門文伯仁黃姬水郭第秣陵盛時泰顧應祥相約
過余觴之齋中齋南嚮先生像在壁間諸子不敢背之
坐各東西席如侍側之禮比邱員瀾餉中冷泉覓得陽
羨貢茶一角烹茶為供以宣甌注之焚沈水於鑪作禮
畢就坐皆歎曰幸甚今日乃得覩升菴先生文子曰今

日之會奇矣余當作人日草堂圖以寄先生余欣然拊掌因拈人日題詩寄草堂遙憐故人思故鄉之句作八闕散諸子請各賦一篇并寄先生見吾輩萬里馳仰之懷越二日文子圖成又二日諸子詩次第成余乃為之引云考行狀嘉靖乙未先生年七十二以是年六月卒於永昌詩畫郵致之時先生已不及見矣按先生集有己未六月病中訣李張唐三君詩所謂魑魅禦客八千里義皇上人四十年是也當時先生流離顛沛遠在天

末而遠近為人企慕如此何殊東坡惜身歿南荒不及
玉局之生還耳彼譏人者遺臭萬年豈止與烟草同腐
已哉

余向喜陳白沙恰到溪窮處山山枳殼花楊夢山太宰
常憶任家亭子上連翹花發共銜杯新異不經人道偶
閱升菴先生集一絕句云滿城幾日黃梅雨開徧金釵
石斛花益新

以戶部左侍郎蔣宏道為都察院左都御史右侍郎王

士禎轉左侍郎內閣學士兼禮部侍郎王掞為戶部右

侍郎

江南江西總督兵部侍郎傅臘塔卒左都御史范承勲未任改兵部尚書總督兩江故也

滇南舊無鴻雁順治庚子始有之千百為羣皆西向飛去自是年年有之不見北鄉者右見滇志然升菴集有泛滇池見新雁詩

升菴客滇遊其門者自六學士外又有隱士董難難字西羽太和人常輯轉注古音著韻譜滇志列隱逸傳曾見其題玉局寺一詩極佳錄之杜鵑枝上春可憐杜鵑

聲裏雨如烟萋萋滿目芳草碧杳杳一髮青山懸忽悲
麥秀客遊次却憶棟風花信前惆悵池塘綠陰樹驚心
一曲南薰絃風格宛似升菴

何易于唐書在循吏傳孫樵嘗書其事文極工按檀弓
曰易則易于則于易于雜者未之有也易于之名義蓋
取此然取名於喪禮何耶

以翰林侍讀學士徐嘉炎為內閣學士兼禮部侍郎
特賜原任福建興泉道叅議陳啓泰謚忠毅原任浙江

溫處道僉事陳丹赤亦謚忠毅

過國子博士孔東塘

尚任

觀宋方爐款識云紹興二年大

寧殿臣蘇漢臣監督姜氏鑄至德壇用凡二十字小篆
姜氏即姜娘子

東塘又出示蔡卞書曹娥碑大字末云宋元祐八年正
月左朝請郎充龍圖閣待制知越州軍州事蔡卞重書
京卞兄弟皆工書亦章惇之比不中與蘇黃作奴

又觀歐陽永叔隴岡阡表此永叔在青州所刻石為江

神借觀者其事甚異然書法殊平平不如江神嗜山谷
書韋詩具眼或嗜其文章耶

觀漢甘黃玉笛吹之成聲又觀漢銅尺司馬溫公布帛
尺唐韓晉公滉小忽雷宋紹興御製大海潮背有橫書
小篆三字背皆龜文其面紋理自然成三十六峰其下
有潮汐浩洶之狀故名

淮陰門人張力臣

紹

年七十矣寄所刻昭陵六馬圖贊

及辯云唐太宗葬文德皇后於昭陵御製刻石文并六

馬像贊皆立於陵後命歐陽詢書無庸疑矣乃游景叔
云高宗又詔殷仲容別題馬贊於石座又云詢書不復
見殷書獨存今所傳之贊正仲容所別題非太宗御製
若然則贊有異詞書有兩種矣謂得之園陵記果足信
否是以趙紫函有四疑范仲闇又援升菴殷譔歐書之
說互有不同弔於康熙辛亥冬從漢南過雲棧冒雪至
醴泉抵趙村石鼓寺宿明日登九峻甬道恭謁殿前上
下歷覽皆如昭陵諸志所云審視六馬其制琢石如屏

風每方高四尺五寸廣五尺五寸厚一尺週遭邊界稜起馬身半鑿空處剝下三寸西第一四蹄端立有馬圉前立拔箭東第一西第二則三蹄立前左一蹄作奔勢餘三則絕塵而奔各馬頭之上隅皆留石一尺正方與邊界相平隱隱有字跡是當日刻贊處也下座每邊三馬相連各離尺許共置一座座面之石即與地平合縫有鐵錠連屬是石座無容書處也不知景叔何以不察紫函以為馬無座書誠是矣昭忍凍槃旋其旁者兩

日撫摩推測惟喜得上一隅書贊之處顯然可見想因其地位頗狹筆法細瘦非同大書深刻更經千百載風雨剝蝕固當漫滅幸趙氏金石錄云昭陵刻石文六馬贊皆歐陽詢八分書世或以為殷仲容書非是至諸降將名氏乃仲容書耳今附於卷末是歐殷兩書各存之徵也今馬之上方無一字可見是歐書已亡之徵也又據志云駿石居後殿左右下一坎兩行列數石人或無上半且下埋入於土皆不全此貞觀中擒服諸番將君

長頡利等十四人之像琢石刻之北司馬門內者昭視
之其餘無幾并下半衣甲之紋亦殘毀不可名狀安得
有胸前之字是殷書已亡之徵也紛紛懸擬不須置辯

但觀趙說自明矣越翊日馳至舊縣觀太宗廟遺址見

昭陵圖六駿圖

即游景叔倣陵石制畫
刻一碑每馬高七寸許

二碑巍然對列

各拓數紙歸乃倣刻為圖綴鄙說焉至番將十四人游
記止有十二人蓋彼時已闕其二矣已未入都見朱竹
垞太史所察唐書列傳載有十人其相同者七不同者

三為棄宗弄讚龜茲王白葉護于闐王尉遲伏闍信亦
無確據未敢指定誰是附書於末以待識者教之癸酉
端午日戊申

註書之難不惟吾儒如陸務觀所云不敢註蘇杜之說
也乃如釋氏亦然神僧傳道安注諸經誓曰若所說不
遠於理願見瑞相乃夢一道人頭白眉長語安云子所
注甚合道理我不得入泥洹住在西域當相助通所夢
即賓頭盧也宗門統要唐紫璘供奉擬注思益經南陽

忠國師問凡注經須會佛意始得供奉云若不會佛意
爭解注得師令侍者盛一椀水著七粒米在水中椀面
安一隻箸問遮箇是甚麼義璘無語師云老僧意尚不
會豈況佛意此二條可與陸說發明

戶部疏奏在京王以下滿漢文武官員康熙三十三年
秋季分應支俸銀五十八萬五千五百六兩有奇

武攸緒則天兄子也少變姓名賣卜長安市後盤桓龍
門少室間冬蔽茅椒夏居石室晚年瞳有紫光晝能見

星右見唐書又釋靈坦則天姪孫常聞空中語云開心
地即見菩薩如文殊像曰與汝印驗令舉首以手按之
後印跡恒見止潤州金山寺山北有龍穴常吐毒氣如
雲坦居之毒雲滅跡華林寺內有張遼墓寺僧多為鬼
物惑亂坦居之鬼息右見神僧傳北狐家多出高人如
此亦異事也平一雖畏禍隱嵩山終不能遠引而去不
足道矣世亦傳李林甫與其女皆仙女即太白詩所謂
廬山女道士李騰空者

特贈總督兩江侍郎傅臘塔太子太保給一拜他喇布勒哈番令其子承襲

居易錄卷二十五

欽定四庫全書

居易錄卷二十六

刑部尚書王士禎撰

今人事事不及古人如郡縣志書亦其一也華陽國志
三輔黃圖等勿論矣即予近所得明黃才伯佐廣東志
李川父濂河南通志洎舊藏陸鼎儀鉞山東通志皆精
審不苟惜升菴四川總志馬伯循陝西通志未及見爾

曩曲沃相衛文清公

周入祚

朝請修

大清一統志暨修直省通志而吾鄉新通志修於癸丑
當事既視為具文秉筆者又鹵莽滅裂不諳掌故如人
物一門竟將曹縣李襄敏公秉單縣秦襄毅公紘沂州
王恭簡公景三鉅公姓名事實削去不存一字其餘可
槩見矣時方伯施泰瞻天裔主其事聘吳郡顧炎武亭
林在局而不一是正潦草成書甚可惜也今方修一統
志似當以舊通志為藍本

蘇氏織錦迴文詩則天記云二百餘首楊文公讀至五

百餘首明僧起宗乃又分為七圖一百四十七段得三四五六七言詩至三千七百首某王府刻之僧亦異人而蘇氏方寸之圖古今行之如無盡藏神矣哉

田少司寇漪亭

震

言撫黔時署中庭砌有草結實甚紅

可玩詢之役人曰斷腸草也一日有釵頭小鳥色如鸚鵡飛啄其上捕之甚易馴致名斷腸鳥唯食斷腸草子不食餘物按博物志云太陽之精名曰黃精天老曰太陰之精名曰鈎吻鈎吻即斷腸草也七修類稿鈎吻與黃

精同穴對待而生形如黃精

周實字青士家禾郡之梅里以賣米為業自晨至午居肆過午輒下簾閉肆登小樓讀書喜為詩與朱彝尊李良年鍾淵映比鄰相善一日遊嘉善館柯氏園月夜吟詩意得遂至達旦適郡丞季某以事至署與園鄰聞周吟聲彷徨不能寐詰朝詢知其故逮至杖而逐之予曰袁彥伯使不遇謝鎮西幾不免虎口

唐人好為鬼神誕妄之說如織女弄玉西子等事皆屬

不經李羣玉賦詩湘女廟自云遇娥皇女英段成式戲之曰君虞舜之辟陽侯也侮聖如此可謂無忌憚矣

晉僧意在瓦官寺問王修曰聖人有情不曰無意曰聖人如柱耶莊子謂東郭子曰道在螻蟻在稊稗在瓦甓在屎溺此等語與禪宗牆壁瓦礫樹林水鳥露柱燈籠等話頭何異

華亭門人周綸字鷹垂才士不偶有子名稚廉字冰持少年以錢塘觀潮賦知名下筆千言而悠悠忽忽迹類

清狂常除夕署門一聯云論家世如閣帖官窰可稱舊
矣問文章似談箋顧繡換得錢無未幾卒二物皆松江

產也

或云雅廉好
食生蝸牛

十五日

上諭諭戶部朕惟黎元率育全恃農桑每遇歲時豐穰
比屋皆能自贍倘一經旱潦粒食無資即有俯仰不給
之虞非相時緩急而先事圖維則補助之恩難以遍霑
頃巡歷邊外道經密雲等處地方見田畝歉收米穀價

貴閭閻匱乏衣食不充目前既已艱難來歲何所依賴
宜預為籌畫用裨資生著遣部院堂上官二員會同直
隸巡撫親詣州縣詳察明白應作何區處調濟確議具
奏其八旗披甲當差及年老有疾中傷退閒人等有實
係貧窶窘於謀生者著該都統詳察姓名報部應作何
恩恤爾部議奏尋有

旨遣吏部侍郎安布祿戶部侍郎法爾哈往

二十四日武闈榜放會元倪錦浙江蕭山人

上諭復已故原任刑部尚書徐乾學官以修書舊勞也
蔣總憲裕菴說康熙癸丑滇逆未變時一日有人喚兩
輿夫云欲往齊化門外嶽廟謁客比至下輿入徑趨廊
下其中先有多人切切低語至晡不出輿夫恐城門閉
入視之聞無其人神案上有僱值錢若干在焉乃知非
人也

景陵熊寅字國亮萬曆壬辰進士客京師遇異人自稱
鄒月賓以赫䟽書授寅曰有阨發此當相助俟芙蓉嶺

更相見也後渡彭蠡風大作檣摧桅折急發書視之風
忽止舟得無恙書中有告汝婺源云云謁選果得婺源
縣令一日自縣之郡行峻嶺上忽於空中見月賓相與
道故良久始不見詢其地則芙蓉嶺也壬寅元日夢鄒
來曰龍華會近矣遂卒

九月二十二日已刻經筵

上御文華殿滿講官吏部尚書庫勒納兵部尚書索諾
和刑部尚書圖納都察院左都御史傅臘塔吏部左侍

郎兼掌翰林院事常書禮部左右侍郎席爾達多奇工
部右侍郎常綬漢講官吏部尚書熊賜履禮部尚書兼
掌翰林院事張英兵部尚書杜臻刑部尚書翁叔元工
部尚書李振裕吏部右侍郎兼翰林院學士彭孫通戶
部左侍郎王士禎禮部右侍郎兼翰林院學士王封滌
東西侍尚書庫勒納侍郎彭孫通進講大學詩云樂只
君子一節都御史傅臘塔尚書英進講尚書敷奏以言
三句講畢

上御

乾清門召見內閣九卿詢問原任將軍趙良棟御史任
宏嘉條奏事移晷乃退

賜宴太和門

召原任內閣學士兼禮部侍郎韓茨原任右春坊右中
允徐秉義於田間并召原任刑部尚書徐乾學左都御
史王鴻緒少詹事兼侍講學士高士奇入京修書

禪宗頓漸二門分途久矣而頓門又自為矛盾互相排

詆於佛祖無諍之義何居嘗讀吳興皎然禪師能秀二祖贊云二祖之心如月如日南北分宗工言之失此語足為今日僧徒好鬬諍之良藥特拈出之

召試戊辰科進士唐孫華特授禮部儀制司主事

孫華太倉

人子門人時已
銓補朝邑知縣

十月朔

午門頒三十四年歷始列蒙古屬國諸部節氣晝夜時刻曰烏朱穆秦曰科爾沁扎賴特阿霸哈納蘇尼特杜

爾伯特蒿齊忒毛明安郭爾囉斯阿彖科爾沁阿霸垓
四子部落巴林札魯特喀爾喀喀喇沁教漢翁牛特土
默特奈曼克西克勝吳喇忒鄂爾多斯

本朝正朔之遠暨如此

以兵部左侍郎王維珍為浙江巡撫巡撫浙江僉都御
史張鵬翮陞兵部右侍郎

初七日武進士臚傳一甲三人狀元曹曰瑋京衛人榜
眼丁爽陝西人探花石鈞湖廣人

初九日大雪初晴

駕幸南海子初十日

幸暢春園十一日

幸玉泉山十二日十三日大閱於玉泉

宗姪茂京

原祁

庚戌進士今為禮科都給事中太常烟客

先生孫同年端士兄

揆

長子也畫品與其祖太常顏頤

為予雜做荆關董巨倪黃諸大家山水小幅十幀真元人得意之筆又自題絕句多工其二云蟹舍漁莊略約

邊柳絲荷葉關清妍十年零落荒園景彷彿當時趙大

年

西田圖

橫岡側面出烟鬟小樹周遮雲往還尺幅巒容

寫荒率曉來剪取富春山

大癡富春山嶺

一日秋雨中茂京攜

畫見過因極論畫理其義皆與詩文相通大約謂始貴

深入既貴透出又須沈著痛快又謂畫家之有董巨猶

禪家之有南宗董巨後嫡派元惟黃子久倪元鎮明惟

董思白耳予問倪董以閒遠為工與沈著痛快之說何

居曰閒遠中沈著痛快惟解人知之又曰仇英非士大

夫畫何以聲價在唐沈之間徵明之右曰劉松年仇英之畫正如溫李之詩彼亦自有沈著痛快處昔人謂義山善學杜子美亦此意也

命兵部督捕侍郎趙山通政使司右通政張雲翮工科掌印給事中博爾濟兵科給事中趙心忭閱視河工

忭心忭

蜀西充人予門人也

濟源縣段少司空園是玉川子煎茶處中有二泉或曰玉泉去盤谷不十里門外一水曰潁水出王屋山按通

志玉泉在瀧水上盧仝煎茶於此今水經注不載

車駕主事龔衡圖

翔麟

借襄陽守城錄寫本一卷記南宋

開禧二年荆鄂都統趙淳守襄陽事首署門生忠訓郎
趙萬年編無名氏跋云按史開禧用兵止載畢再遇數
有功而詳其事趙淳止有焚樊城而遁之計魏友諒突
圍而去事今慕容記注乃若此然則魏當何如記之耶
豈史臣多遺逸而不及見此耶抑以為誇張失真而不
之取耶皆不可考也

陸右丞蹈海錄一卷京口丁元吉撰首宋史陸秀夫列傳次熊開傳次輓詩有龔序五言方回曾微一杯土魚腹葬君臣龍仁夫無地叅黃鉞終天慘玉衣仇遠甘抱白日沒不知滄海深方鳳鰲背舟中國龍胡水底天七言湯炳龍人心自感興元詔天意難同建武時盛彪平地已無行在所丹心猶數中興年數聯最警策末載吳萊桑海遺錄序右丞遺文丹陽館記一首

保越錄一卷記元至正十八年浙江等處行樞密院副

使呂珍守紹興本末不著作者姓氏

先曾祖大司徒府君昔撫楚誅何心隱一案千古自有

定論前卷詳其顛末矣近觀馮文敏公

琦

北海集有寄

府君一帖云南中縉紳皆謂何心隱行兼三游罪浮四

凶置之憲典孰以為非三尺之平今中丞不辨其當罪

而以罪之者不在己若將移事於臺下者蓋季孫行父

逐莒僕而自以為於舜之功二十之一也意在構怨而

適足歸功於臺下何病為此書與弇州先生云云皆公

論益知趙崇善狂吠為可恨也

西洋意大利亞國遣其臣世襲公斯畢叻納及瑪諾薩
進貢將至香山嶼門而斯畢叻納病死瑪諾薩言彼國
恒患大風數年無之且雨暘時若彼國善天文者云中
國有聖人在位故貢方物以輸悃誠其國距中國十萬
里凡經七國行三年始至粵其貢物有自鳴琴千里鏡
等凡二十二種九十八件

右見廣東
巡撫題疏

采石瓜洲斃敵記一卷紀虞雍公事雍公門人潼川蹇

駒撰隆興改元漫叟序擬以韓碑柳雅不著姓名

酌中志餘彙載泰昌啓禎三朝書八種東林朋黨錄點

將錄同志錄東林籍貫盜柄東林影影壞封疆錄天鑒

錄欽定逆案附天啓宮詞同志錄部院五十七人先太

師公名列十一部曹四十一人從叔祖吏部

象春

名列第

一東林籍貫山東十三人首太師終吏部其十一人曰

畢自嚴張鳳翔劉策柳佐王洽宋槃翟鳳翀程紹史永

安房可壯袁化中云

御製百家姓首云孔師闕黨孟席齊梁高山詹仰鄒魯
榮昌冉季宗政游夏文章即開端數語已見

崇儒重道之盛心矣

以通政使司左通政常翼聖為都察院左僉都御史

僉都

御史劉超
凡病卒

十一月初三日

貴妃薨初五日權厝城東花園滿漢三品大臣已上俱
赴殯宮予以

南郊陪祀例不與十三日

冊諡溫僖以大學士吏部尚書伊桑阿禮部左侍郎兼太常寺卿席爾達充正副使是日五鼓民公侯伯已下郎中已上俱赴殯宮

宋劉昌詩蘆浦筆記載治喘方麻黃三兩不去根節湯浴過訶子二兩去核用肉二味為粗末每服三大匕水二盞煎減一半入臘茶一錢再煎作八分熱服無不驗者又云彭子壽侍郎一方用新羅

即今高麗

人參一兩為末

雞子清和為丸如桐子大陰乾每服百粒溫臘茶清下
一服立止

宗人通政使司右通政青巖焯傳一方治男婦氣血虧

損即喘嗽寒熱重症亦能治之其方止用人參一分真
三七二分共為末無灰熱酒調服二煎三煎皆如前日服
三次有奇効

以兵部右侍郎張鵬翮提督江南學政

提督江南學政
叅議邵嗣堯卒

禮部疏請廣八旗生員額數查八旗滿洲蒙古原額取

生員四十名今將上三旗包衣滿洲佐領渾托和并五旗包衣滿洲佐領俱應歸併八旗滿洲蒙古考試共取進生員六十名八旗漢軍原額取生員二十名今將上三旗包衣漢佐領併五旗包衣漢佐領俱應歸併八旗漢軍考試共取進生員三十名奉

旨允行奉天府府丞金璽疏請照例廣生員額亦允行唐趙蕤長短經第二十篇曰懼誠引尸子曰昔周公反政孔子非之曰周公其不聖乎以天下讓不為兆人云

云此荒唐悠謬之論乃孔子之所必誅而託名聖人真可謂無忌憚者孟子惡處士橫議正謂是也

命兵部覆試下第武舉取五十人

駕幸瀛臺親試騎射技勇

以在籍原任刑部尚書陳廷敬為戶部尚書

命吏部右侍郎安布祿戶部右侍郎法爾哈查勘直隸被災州縣復

命得

旨這安州等十一州縣賑濟貧民著一半給與米穀一半給與銀兩所餘米穀著照時價稍減發糶於民密雲迤北州縣著守道沈朝聘文安等迤南州縣著巡撫郭世隆親行散賑發糶仍著戶部賢能司官各一員公同料理務俾小民得霑實惠其十一州縣康熙三十四年地丁錢糧俱著蠲免

十一月初三日致仕文華殿大學士兼吏部尚書李之芳卒年七十有四

賜諡文襄昔閩逆之亂兩浙震驚公方駐節杭州聞警即移鎮衢州與賊大小百七十餘戰身冒矢石為將士先賊卒不能踰錢塘江一步窺江南者公之力也公屬予為作年譜序未脫橐而公薨

十五日刑部左侍郎鄭重卒於位公字山公福建建安

人順治戊戌進士予同年石交也往哭之慟予平生哭

友最慟者施侍讀愚山

閩章

葉文敏訥菴

方

藹沈文恪繹堂

荃
暨公四人耳

初江陰縣治鄰廣福寺令出入以寺鐘為度康熙初鐘
忽累夕不鳴令怪而詰之僧對曰樓有妖物不可上令
怒笞之縣有杲禪師者戒行甚高寺僧試往求之杲曰
必狐也狐性嗜雞而忌梧子油可以梧子油炙雞置樓
下彼來竊啖必大吐委頓伺之可掩取也僧如教果獲
一狐色純黑而九尾狐被縛怒曰吾千歲狐也得道已
來橫行大江南北無敢撓者所畏者惟三人耳若何人
斯而敢賺我僧詰三人為誰狐曰東郭單學究城南劍

菴杲和尚靖江知縣鄭公重也三人外吾皆得而侮之
僧曰是即杲和尚命也狐曰然則吾當遠避且鄭公將
來攝此邑吾從此逝矣僧釋之遂去未幾令遷去鄭果
至鄭起家靖江令為政清惠平恕入為行人擢吏部歷
掌考功文選有清望洊副憲少司寇矜慎庶獄言無
不盡不肯嬖阿詭隨雖和易近人不立崖岸而是非之
介屹然不可搖奪下直閉門晏坐於名利澹如也尤篤
友誼同年故交或物故數十年其子姓來京師者必極

意賻卹之無倦色遇人一以至誠不逆詐也田少司寇

綸霞

雯

云鄭公真聖賢真名臣予以為知言

契丹國志后妃傳道宗蕭皇后本傳云性恬寡欲魯王
宗元之亂道宗同獵未知音耗后勒兵鎮帖中外甚有
聲稱崩葬祖州云云而已焚椒錄所紀耶律伊遜張孝
傑輩讒構賜死之事絕無一字及之又錄稱后為南院
樞密使惠之少女而志云贈同平章事顯然之女志言
勒兵似嫺武略者而錄言幼能誦詩旁及經子錄中所

載射虎應制諸詩及迴心院詞皆極工而無一語及武
事且本紀道宗在位四十七年改元者三清寧咸雍壽
昌初無太康之號而錄載伊遜密奏太康元年十月據
宮婢單登及教坊朱頂鶴陳首云云已上皆牴牾不合
不可解也按遼史宣懿皇后傳雖略而與焚椒錄所紀
同蓋契丹志之疏耳志惟載天祚文妃善歌詩其詠史
云丞相朝來劍珮鳴千官側目寂無聲養成外患嗟何
及禍盡忠臣罰不明親戚並連藩翰地私門潛蓄爪牙

兵可憐昔代秦天子猶向宮中望太平按史亦載此詩
是騷體非律

同年梁溪秦宮諭留仙

松齡

以寫本詩總聞相寄宋人汶

陽王質撰其例曰聞南聞風聞雅聞頌又聞音聞訓聞
跡聞事聞物聞用聞章聞句聞字而終以總聞其書援
據亦博而好與毛鄭異亦絕與朱子不合如衛詩栢舟
燕燕鶉之奔奔二子乘舟鄭詩狡童將仲子有女同車
青青子衿之類甚多如云鄭忽言行蓋多近賢不可以

成敗論人所謂狡童非忽也又云文姜鄭忽所辭者也
以為賢而不娶識者更詳之此言最允然於齊詩南山
猗嗟諸篇皆無異詞後有宋人跋云右雪山王先生詩
說二十卷其家櫝藏且五十年未有發揮之者臨川貳
車國正韓公攝守是邦念前輩著述不可湮沒乃從其
孫宗旦求此書鏤梓以傳命工經始而日強分符來此
公餘取讀之其刪除詩序實與文公朱先生合至以意
逆志自成一家真能寤寐詩人之意於千載之上斯可

謂之窮經矣淳祐癸卯季冬上澣吳興陳日強書此跋
謂與晦翁合亦非也

王紱孟端友石先生集亦秦宮諭寫寄有曾榮王璉二
序翰林修撰王洪撰傳中書舍人章炳如撰行狀翰林
學士胡廣撰墓表按孟端為人狂簡今集中詩多卑弱
蕭灑不如倪元鎮沈鬱不如王原吉磊砢不如孫大雅
差與浦長源伯仲耳

西域南懷仁著坤輿圖說所記西洋諸國物產多異其

尤奇者有七一亞細亞州巴必鸞城瑟彌辣米德王后造形勢矩方周迴二百里城門凡百皆範銅為之城高十九丈闊四丈八尺白石砌成上有園圍引水為飛瀑如溪澗然一樂德海島銅鑄一巨人高三十丈立海口兩足踏兩石臺跨下能容海舶往來其手指逾合抱右手持鐙佑舟望之知泊處其身中空自足至手有螺旋梯造十二年乃成一亞細亞州嘉略省茅索祿王墓亞爾德彌細王后為其夫造下層矩方四面各有白石柱

二十六株回廊相通寬七丈餘中為石梯以達絕頂頂上銅輦一銅馬二茅索祿王象一工既畢后遂殉之一

亞細亞州厄弗俗府供月祠祠建湖中高四十四丈闊

二十一丈中有石柱一百五十七株各高七丈祠外有

白石飛梁四以通四門相傳二百二十年乃成

其他不錄

又

亞墨利加墨是可國都城四十八里皆在大湖中以獨

鹿木為椿上加板城郭宮室弘麗精絕意大理亞

在佛郎察

東西北為勿搦祭亞國城建於海中異木為椿入水不

朽其上鋪石造宮室衢中皆海兩旁通陸行城中有海
艘三萬橋梁之下可渡風帆又印度河西百爾西亞國
城百二十門有苑囿造於空際下以石柱承之上覆土
石樓臺池沼草木鳥獸皆具羅瑪國城有名苑鑄銅為
百鳥發機皆鼓翼而鳴如其本音

此不在七
事之列

所載鳥獸

草木略摘錄於左瓜哇島有無對鳥無足腹下生長皮
類筋恒纏於樹毛羽五采服氣不飲不食印度國有獨
角獸毛黃頭有角能觸師子解諸毒印度國有鼻角獸

鼻上一角堅如鋼鐵能觸象南印度國有山羊頂生兩乳意大理亞國有般第狗晝潛水中夜臥於陸歐邏巴州熱爾瑪尼亞國有獸名撒辣漫答辣性寒能滅火利未亞州額第約必亞國有狸猿其身上如狸下如猿重腹類囊遇獵人即藏子於囊中亞毘心域國有獸名惡西那約如馬形足前長後短頸甚長自前足至首高二丈五尺毛具五采亞墨利加州白露國有雞大常雞數倍有肉鼻能伸縮毛羽黑白相間尾開屏如孔雀伯西

爾有鵲吻長等身空明如紙南亞墨利加州有駱駝鳥
形如鶩首高如人乘馬行則張其翼疾如馬其腹熱能
鎔鐵意而蘭大有犬能殺虎印第亞即天竺五印度有
陰樹夜中開花晝則否有菩薩樹有異象能通人語有
巨鳥喙能解毒一喙直金錢五十枚其貓有肉翅能飛
印度河西曰百兒西亞有塔以黃金鑄成之亞喇北亞
有樹如橡栗夜露墜其上即凝為蜜得白得以珊瑚為
幣則意蘭海生珠河生猫睛昔泥紅金剛石亦多水晶

國人或琢為棺呂宋之南曰木落各有大龜壳容一人
國人用之為盾亞細亞海中曰祭波里島有蒲桃酒可
度八十年不壞有火浣布乃煉石為之歐邏巴州有利
諾草為布細滑堅韌敝可搗為紙佛郎察有藍石覆屋
代瓦羅瑪西北為勿搦祭亞有溫泉女子不育者浴之
輒育哥生濟亞有兩河一濯髮則黃濯絲則白一濯絲
髮皆黑又從納波里至布里城有山山多洞洞各主療
一疾西齊里亞有巧工造百鳥能飛乃至蠅蝸亦能飛

又有幾墨德者天文師也嘗有敵國乘數百艘至鑄一巨鏡映日注射敵艘即有火發衆艘皆燼又造巨船千人不能運幾墨德一舉手船即入海又造渾天儀凡十二重日月星宿運行遲疾與天無二以玻璃為之哥而西加有犬善戰一犬可當一騎拂郎察東北曰熱爾瑪尼亞工作精巧能於戒指內納一自鳴鐘羅得林日亞其國王堂中以珊瑚琅玕作屏幃又波羅尼亞屬國有波多里亞海濱出琥珀是海底脂膏自石罅流出浮水

面見風始凝翁加里亞在波羅尼亞之南有四水一從地中噴薄而出即凝為石一冬解夏冰一投以鐵化為泥再鎔又為精銅一水色沈綠凍則成綠玉不復化歐邏巴西北有四國曰大泥亞諾而勿諾亞雷際亞鄂底亞其南夏至日長六十九刻其中長八十二刻夏至日輪橫行地面半年為一晝夜羅馬泥亞國有島曰厄歐白亞海潮日七至哥兒府產橘柚香櫟更無他樹亞細亞西盡境曰莫斯科未亞其地夜長晝短冬至日僅二

時地中海有島百千六百曰甘的亞有草名阿力滿食之不饑風浪最大不可行海鳥有亞爾爵虐者巢於水次一歲一乳乳時風浪不作商船候之以渡海歐邏巴西北西海迤北至冰海為意而蘭大有湖插木其中入土者化為鐵水中者化為石為諳厄利亞有聾石隔石即鏡砲不聞有湖長百五十里魚味最美皆無鰭翅中有小島無根因風往來上生林木甚茂又有三湖相通其魚不相往來有海窖潮時吸水不盈潮退則噴水如

山其迤北多巨魚以魚骨為舟車宮室皮為舟遇風不
溺又格落蘭得地多火宛轉作溝以通火火所至便置
甌釜終古不滅利未亞州產葡萄樹極高大有鳥名亞
既刺為百鳥王羽毛黃黑色高三尺首有冠喙如鷹隼
有山狸膺後一肉囊香滿其中如麝病向石上剔出之
乃瘞有馬善走能鬪虎國人夜睡不夢曷疆刺國西南
海有大浪山海船不能渡有暗礁利若鋒刃皆珊瑚利
未亞東北大國曰厄日多其地自古無雲氣不雨有河

曰泥瑯河水到處即成膏腴有巧工作龍尾車以時蓄
洩羸能生育殊他國弗撒國王所居殿長廣三里開三
十門夜然燈九百盞亞非利加一麥秀三百四十穗莫
訥木大彼亞國有巨象一齒重二百斤有獸類猫尾有
香汗汗沾木即成奇香利未亞西北有福島無雨百穀
自生中有鐵島生樹最大日夕有雲氣抱之釀成甘露
下滴日出雲散下作數池皆滿人畜沾足南亞墨利加
州白露國有羊可代馬能絕食三四日肝生一物如卵

療諸疾海商貴之有鳥名厄馬長頸高足羽毛珍麗足
若牛蹄不飛而善走奔馬不能及卵可作杯番船所市
龍卵是也伯西爾國人皆老壽無疾病他方病不能療
至其地則瘳有虎饑時百夫莫當飽即犬可斃之婦人
幼即鑿頤脣為孔嵌以猫睛夜光諸寶有大魚曰白都
狼漁者乘之以捕他魚有銀河河水溢則布地皆銀沙
智加國人最長大可一丈許一齒闊三指長餘四指北
亞墨利加州墨是可國工人緝鳥羽作畫光彩生動市

肆鬻書西南曰花地人皆牧鹿飲其乳若牧羊然曰瓦
革子地多沙以魚頭布沙中每頭種穀二三粒魚腐地
肥獲倍常土曰古已有鳥夜舒翼有光自照海族有魚
名把勒亞長數十丈首有二孔噴水仰出遇海船則昂
其首注水船中水滿舟沈遇之者以盛酒巨木罌投之
輒吞數罌而逝又斯得白長二十五丈性善能保護人
人或為鱷魚困者此魚輒往鬪解其厄故國法禁捕之
仁魚性亦慈嘗負一兒登岸兒為鬻觸死魚亦自觸死

劍魚策長丈許齒如鋸與把勒魚戰海水盡赤尾刺多
似鱷魚鱗甲甚堅刀箭不能入足有利爪性獐惡入水
食魚登陸人畜食無所擇口中無舌不喜食蜜初生子
如鵝卵漸長至二丈許吐涎於地踐之者輒仆因就食
之見人遠則哭近則噬仁魚能以利鬚刺其腹而殺之
有乙苟滿者鼠屬大如猫以泥塗身令滑入腹齧其五
臟又能破其卵有香草曰離腹蘭魚畏之輒避去又落
斯馬長四丈足短居海底罕出額有二角如鈎睡則以

角挂石盡日不醒

魚目不瞑此獨善睡

有獸名海魔二手二足力

甚獍遇海船輒顛倒播弄之多遭沈溺有飛魚可以占

風船魚介屬有殼而六足足有皮以半殼為舟以足為

帆乘風而行海蟹大踰丈以螯夾人脰立斷海女上體

是女子下體魚形其骨止血海人有二種一通體皆人

鬚眉畢具特手指相連如鳧爪西海人有得之獻國王


者不言亦不食復縱之海回盼鼓掌大笑而去又西洋

曷蘭達地於海中獲一女子與之食輒食亦為人役但

不能言自有肉皮無生地如長衣然西人亦莫測其族類

東西二紅海水色淡紅是海底珊瑚所映也

以大理寺卿陳汝器為刑部右侍郎太常寺卿李輝祖為大理寺卿



居易錄卷二十六

欽定四庫全書

子部

居易錄卷二十七

詳校官侍讀_臣陳崇本

員外郎_臣牛稔文覆勘

總校官中書_臣朱 鈐

校對官中書_臣方大川

膳錄舉人_臣龔秉震

欽定四庫全書

居易錄卷二十七

刑部尚書王士禎撰

康熙三十四年乙亥二月暫停

經筵

重建太和殿自二月二十五日鳩工李少司空貞孟

元振

言有老工師梁九者董將作年七十餘矣自前代及本朝初年大內興造梁皆董其事一日手製木殿一區以寸准尺以尺准丈不踰數尺許而四阿重室規模悉具

殆絕技也初明之季京師有工師馮巧者董造宮殿自萬歷至崇禎末老矣九往執役門下數載終不得其傳而服事左右不懈益恭一日九獨侍巧顧曰子可教矣於是盡傳其奧巧死九遂隸籍冬官代執營造之事一技之必有師承不妄授受如此柳子厚作梓人傳謂畫宮於堵盈尺而曲盡其制計其毫釐而構大厦無進退焉殆類是與

宋時汴京有都料匠喻皓撰木經三卷或云皓有一女

每卧則交手於胃為結構之狀如此逾年撰成木經三
卷又秦始皇時騫霄國獻刻玉善畫工名喬方寸之內
畫以四瀆五嶽列國之圖出拾遺記元和中裴宙鎮荆
州掘地得一石規模樓櫓悉倣荆城中空六尺八寸甚
工緻命徙之藩籬間見江陵志

巡撫山西副都御史噶爾圖疏報平陽府臨汾洪洞襄
陵浮山等縣於四月初六日戌時地震傾倒公私解舍
房屋四萬餘間壓死兵民一萬八千有奇二十五日奉

上諭諭戶部頃據山西巡撫噶爾圖同太原總兵官周

復興奏報平陽府地震房舍倒塌人民損傷隨經特遣

司官

戶部員外郎登德等

星馳前往察勘情形比復傳問往來經

過及本籍人員具述屋宇盡皆傾毀人民多被傷斃受
災甚重朕心深切軫惻應作何恩卹着速議具奏部議
照康熙二十二年崞縣等五州縣地震賑恤之例每大
口給銀一兩五錢小口給銀七錢五分得

旨依議仍每名口加銀一兩遣戶部尚書馬奇馳驛速

往

特命平陽府士大夫仕於朝者皆歸視其家都察院左都御史蔣宏道以下凡九人

山西巡撫噶爾圖罷以不候

欽遣賑災大臣即歸太原也

太原總兵官周復興卒以地震傷重故也

五月初八日

東宮婚禮成

賜宴於文華殿之北以金杯

賜酒前數日皆陰雨是日晴霽

巡撫河南兵部右侍郎兼都察院副都御史顧沂罷以

大理寺卿李輝祖為右副都御史巡撫河南以太常寺

卿李鈞為大理寺卿山東布政使喻成龍為太常寺卿

以內閣學士兼禮部侍郎李杲為工部右侍郎

工侍徐潮以內

艱歸

原任內閣學士兼禮部侍郎田喜霽卒

賜祭葬田馬邑人順治辛丑進士

特旨允福建巡撫副都御史卞永譽請寬三藩下及孫延齡下入官脫逃人犯地方官員考成處分之例先是逆藩吳三桂耿精忠尚之信及廣西將軍孫延齡下偽包偽標人員起解入旗逋逃者衆九卿會議責令滇閩粵東西地方官員緝獲一年不獲卽罹降罰罕得免者諸撫臣王繼文王起元等先後上疏請照逃人例案緝每年終出具印信甘結如後有發覺照隱匿之例處分

戶部以事係九卿會議定例不允至是閩撫復以為言
遂得

俞旨

皇恩浩蕩四省地方官始得息肩矣

御書賜吏部尚書庫勒納詩云滇海奇遊萬里餘
天平樓閣化人居鹿門不獨偕龐隱彤管猶能續
漢書尚書以問諸公以為唐人詩也遍簡萬首絕句
不可得一日會議東闕門吏侍彭十兄羨門

孫舉通

以問予予曰此必贈吳郡范長白徐夫人小淑之作

耳熊尚書青岳

賜履

陳尚書說巖

廷敬

詢予何以知之

予曰此易解耳范嘗官雲南監司而歸隱吳之天
平山時趙宦光凡夫亦有才婦曰陸卿子隱居寒山
與徐齊名徐有絡緯吟陸有玄芝考槃二集皆為
時傳誦故以龐公班大家擬之可不疑也彭公曰是
也此

御筆臨董宗伯書當即思白作吾輩但謂是唐詩誤矣

深歎予為善說詩遂記之云

五月門人蔣景祁宋至殷譽慶蔣仁錫邀看棗花於崇
效寺予賦五言古詩二章諸子和之寺有楊忠烈公漣
榜書無塵別境四大字極遒勁

駕在暢春苑部務稍暇五月中與同人諸及門間為結
夏文字之會一賦得五月江深草閣寒一鏡湖五月涼

一五月賣松風人間本無價

壘

工部雪崖詩云閑傍

蒼松置短牀南風蕭灑透衣裳人間第一清涼散休把

千金比禁方南薰灼灼自天中五粒陰多障遠空莫怪
山僧閒橫口快哉不數大王風嘒嘒鳴蜩毒熱新松枝
輕颭午風勻此間好是清涼國遮莫鋪金肯售人

又二首不

及錄龍刑部雷岸

變

詩云岸幘披襟意爽然憑誰索價且

高懸東坡只欲時人買剛道清風直萬錢滿袖攜歸且
嘯歌紛紛觸熱客何多涼風爭似涼州好此價惟須問

孟佗

又一首
不及錄

二君皆以翰林出為郎署有詩名龐任邱

人通禪理龍望江人工詞曲有瓊花夢芙蓉城諸傳奇

六月連雨至七月
不絕此事遂廢

暢春苑荔枝結實

頒賜內閣部院大臣蓋閩中急遞進

御至是始熟也近日慈仁寺市亦有賣粵中佛桑花者
一株索價至數十金

以國子監祭酒張榕端為內閣學士兼禮部侍郎右春
坊右庶子孫岳頌為國子監祭酒

內閣學士兼禮部侍郎陸萊上疏乞休得

肯准以原品致仕前內閣學士兼禮部侍郎韓茨補原

官

韓去年奉召入京
總裁大清一統志

明憲宗御畫魚藻圖一軸上方題成化庚子御筆鈐以
廣運之寶魚大小凡十枚鼓鬣煦沫於荇藻之間意態

生動乃穆宗隆慶間以賜李文定公

春芳

者今藏其玄孫

工侍

栴
處

總漕兵部右侍郎兼都察院右副都御史王樞罷以湖
南巡撫董安國為總督漕運兵部右侍郎兼都察院右

副都御史

以順天府府尹劉元慧為宗人府府丞

宗人府府丞
唐朝奐假歸

原任戶部尚書王隲卒

賜祭葬福山人順治乙未進士

原任刑部右侍郎李迥卒

賜祭葬壽光人康熙甲辰進士

監察御史龔翔麟疏劾原任勇略將軍趙良棟

改吏部外轉例員外郎外轉府同知主事外轉府通判

賜戶部尚書陳廷敬

御書赤壁賦兵部尚書杜臻

御書白羽扇賦刑部尚書翁叔元兵部左侍郎張集

御書詩詩餘各一幅又賜原任詹事府少詹事兼翰林

院侍講學士高士奇清吟堂國子監祭酒孫岳頌墨雲

堂大字右中允袁佑王右丞詩

山中相送羅
五言絕句

巡撫甘肅副都御史舒書疏報西寧衛集鸞溝范家莊
地方於六月十一日山崩人民一百四十餘家盡被陷

壓其得全者僅四十六人得

旨令陝甘總督吳赫速往勘明即行具奏

上諭吏部兵部各省督撫提鎮官員來京陛見原欲以地方情形及兵民生計面加諮詢具有深意近來京各官輒以進川馬等物為辭多取置辦雖經却還但聞其在任購買大為地方官員兵民之累朕本欲詢兵民生計召令前來乃反致累兵民殊失朕之初意且川馬如果需用自頒特旨令出產地地方辦解何須進獻著通行

嚴飭嗣後一切禁止

巡撫福建右副都御史卞永譽兩疏為故福建總督諡忠貞范承謨巡海道副使諡忠毅陳啓泰請專祠春秋祭祀載入祀典得

旨這所建祠特賜

御書扁額

范祠曰忠貞炳日
陳祠曰忠毅流芳

六月吏部文選司郎中談九乾以事罷有

旨令各部堂上官保舉可任選司者以聞本部公舉貴

州司郎中袁定遠

康熙庚戌進士

奉

旨點用予諡之曰

上以向來選郎多不任職

特旨從諸曹拔尤調補此例從前所無蓋曠典也子獨蒙簡用遭逢不世當積弛之後須極力振刷如昔選郎王

東臯伯勉

順治丙戌進士河南湯陰人

宋開之文運

順治己丑進士直隸南宮人歷

官刑部左侍郎謫端懋加太子少保

二公之所為方足以副

上旁求至意而予輩亦得適於咎戾子勉之矣

總督江南江西兵部尚書范承勲疏為再陳漕糧脚耗之累懇恩特賜支給免追以甦重困以速輓運事江西運漕四十八州縣除南昌新建兩邑外皆僻處山陬糧艘難到水次故民間願出脚耗津貼於官官為代運猶之乎自費自運也後因地方官慮涉私派之嫌附入全書之尾亦曰以公濟公冀免指摘云爾究非額編之款每年奏冊送部開載甚明歷蒙准銷不謂康熙二十六年前漕臣以為此項可省題請扣除部議行追自二十

三年起至今數載毫無完報者蓋以民間自出之費各自運其應輸之米正小民急公之義勿論從前已運之費必無可追即見運之米非給脚耗在官既不能代民白運而在民既追其自出之費又復令其再費再運費重累多勢必挽運愆期深悞漕務臣於今年二月將敬陳江右漕糧等事題請豁免部覆仍未允行伏念我皇上視民如傷一夫不獲動塵聖懷不敢不據實再請伏祈睿鑒係民間自出之費自運其米仍准照舊支給

聽民貼運從前已支之費免其追賠庶重累既甦漕務自速云云得

旨江西所屬州縣多處山陬百姓自願貼費將漕米運至水次著仍聽民貼運從前已經支給者俱免追賠該部知道按江西漕米脚耗追賠一案官苦叅罰民苦係累為十三郡大害久矣巡撫宋榮馬如龍相繼累疏言之予在部深知其不可同事亦多知之而以前人歲久行追之事翻案甚難相與太息而已一旦蒙

聖恩浩蕩如此十三郡之官民如撥雲霧復見天日其
為歌詠尸祝當何如哉此固

朝廷非常之恩而范司馬之德亦所云不可謾分者與
孔博士東塘言曲阜縣東北有石門山即杜子美詩題
張氏隱居所謂春山無伴獨相求劉九法曹鄭瑕邱石
門宴集所謂秋水清無底者是也李太白有石門送杜
二甫詩何言石門路復有金尊開亦其地山麓今尚有
張氏莊相傳為唐隱士張叔明

一作
卿

舊居張蓋與太白

孔巢父輩同隱徂徠稱竹溪六逸者也山不甚高大石
峽對峙如門故名中有石門寺寺後曰涵峯峯頂有泉
流入溪澗往往成瀑布孔於寺前水匯處作亭曰秋水
又於其左起館曰春山皆取杜句也山南有兩小阜俗
稱金耙蓋銀耙齒者子美詩不貪夜識金銀氣之句蓋
偶然即目耳非身歷其處固不知也又故魯城北有范
氏莊即太白訪范居士失道落蒼耳中者孔亦將修復
其址仍取李詩閒園養幽姿之句名以閒園予喜其好

事諾為其作記而先書於此

注家引水經注謂石門在臨邑非是

刑科掌印給事中袁克珮題為請酌定中馬之額變通撥給之例以足軍實以佐邊需事臣維馬政之設周禮最詳漢唐以來莫不以此為重務今甘肅茶馬之法日久廢弛不可不亟為修飭者也伏查順治二年照明季舊例于甘肅等處每年額徵商茶九萬篋以易番馬所中馬匹撥給四川陝西山西河南湖北等省各營及驛站缺馬之用康熙二年以後節裁各省營馬并各驛站

每歲撥給僅百餘匹因用馬不多故中馬數少而茶不得行今洮岷諸處五廳累年積貯陳茶八十餘萬篋除行令變價報銷五十萬篋外尚存茶三十餘萬篋未報年復一年茶愈壅滯而番馬之利所棄多矣臣請查照額徵茶篋依數中馬仍行嚴禁不得濫中老弱馬匹亦不得扣減篋數以致番馬不前約略計之每年行茶九萬篋可中馬九萬匹未變陳茶三十餘萬篋又可中馬數萬匹或番馬來多不妨招商廣中除各營驛照常撥

給外所有馬匹盡解京師以備八旗之用若中馬數多
行茶溢額作何獎勵云云得

旨下九卿詹事科道會議允行所中之馬照例給與營
驛外其餘馬匹令於好水草地方牧放每年將馬數千
匹俟交秋之時差官送紅城口等處奉

旨茶馬事務關係緊要着差專官管理應差官員開列
具奏尋

命內務府郎中李學聖以監察御史銜往

八月刑科給事中袁充珮江南道監察御史任宏嘉內
陞外轉停止一次吏部四司官內陞外轉俱停一次

門人宗人府經歷黃自先

元治

攜唐搨聖教序相示古色

鬱然真舊物也有柯敬仲印王敬美圖書印江寧鄭鑑
谷口題籤

林間錄載洞山語云語中有語名為死句語中無語名
為活句予嘗舉似學詩者今日門人鄧州彭太史直上
始搏來問予選唐賢三昧集之旨因引洞山前語語之退

而筆記

夾山曰坐却舌頭別生見解叅他活意不叅死意達觀
曰纔涉唇吻便落意思並是死門故非活路

漢樓護養呂公事予既辨漢書游俠傳之謬又引張文
潛之語以明之讀寂音尊者林間錄圭峰宗密禪師匿
李訓訓死仇士良捕密詰之怡然曰與訓游久吾法遇
難則救初無愛憎死固吾分寂音譬之香象擺壞鐵鎖
自在而去此佛菩薩果位中人乃真義俠也彼樓護者

非圭峰之罪人哉

偏沅巡撫陞總督漕運侍郎董安國疏言湖南大後餘
存荒蕪田地前撫臣王樑題請將有荒州縣捐陞之員
暫留原任二年內勸墾成熟方准離任部覆奉有依議
之

旨茲據布政使楊鳳起詳稱日事嚴催據長沙府之善
化醴陵永州府之道州新田郴州之桂陽興寧靖州之
綏寧七州縣共報墾過民屯更名老荒田地塘一百八

十二頃八十一畝九分零應徵條餉銀一千一十六兩
有奇但今二年之限將滿節據長沙等府屬有荒州縣
咸稱康熙三十年奉文清丈地畝稍可開挖者皆已陞
科入冊今之存荒實係沙壅石磊人力難施籲請寬緩
免拘成限云云查湖南田地自丈增後凡屬可墾之荒
俱已入冊陞科餘存荒蕪實難開墾若人力可施小民
原以耕鑿為業當茲

堯天舜日之下作息自由豈肯以有用之土地置之荆榛灌

莽耶此實耒耜難施猶期草萊漸闢如必責之限內全墾保無有不肖有司畏考成而重敲扑致啟壓勒報墾之弊乎我皇上蠲租薄賦恩洽區宇臣身任撫綏敢不仰體

皇仁自甘緘默恭請

敕部准照各省墾荒事例聽民自便陸續墾報免拘年限有司既無考成顧忌之虞小民可省抑勒捏報之弊楚南北庶頂戴

聖恩浩蕩無涯矣

調漕運總督董安國為河道總督以山東巡撫桑格為

漕運總督

督河尚書于成龍丁外艱

御書扇賜戶部左侍郎思格則詩云宮連太液見滄波
暑氣初消秋意多一夜輕風蘋末起露珠翻盡滿池荷
淄川縣寫橋王氏家殿中藏忽與驢語者二日語終太
息曰子苦將滿吾在此尚須十年奈何此甲戌七月初
八日事長山諸生徐結說

大理府浪穹縣北十五里有茈碧湖一名寧湖出罷谷

山下即洱河之源水如碧玉色湖中有花名茈碧如荷
花而差小其色有白者有澹紅而錦綠者葉似荷錢花
葉本皆入水長五六丈晝則上浮花見日始開夜即拳
曲水底其花清芬殊常采莖葉作羹味過於蓴門人黃
自先^{元治}以大理通判入為宗人府經歷為予道之
擢福建布政使楊廷耀為都察院右副都御史巡撫山
東

文信公墨蹟一幀跋黃文節公書云山谷道人題榮州

祖無大師元上人此君軒如爐鑄鐵而筆力遒勁字勢
飛颺猊虎鬪爭蛇龍變幻莫測去來之迹是殆日月星
辰章於天山川草木形於地而不知孰使之然也古人
詩句字畫稱唐之盛時詩如李杜書如顏柳無加矣至
我宋熙豐元祐間道人者出不惟可追駕古人遂至兼
取衆長集之一已云云吉州文山文天祥跋書不必工
有歲寒松栢之氣

謝郎中方山

重輝

言明末德州修河堤於銀瓦寺前地中

得古鏡一規製甚小照見隔城樓閣塔寺人物往來纖毫畢具寺僧深匿之今亡矣

田少司寇漪亭言德州兵器庫自明季扁鐫久順治初開視之於室奧壁下見一短人身纔尺許形如老翁偏體有毛左膝長跪左手垂而拳右足履地右肘拊膝而手承頤鬚髮皓白攢眉閉目若悲苦之狀頃之雷電遶屋失所在

德州趙進士仲啟

其星

常月夜露坐仰見一女子妝飾

甚麗如乘鸞鶴一人持宮扇衛之逡巡入月而沒此與予前所記二事相類昇妻之事信有之矣

七月餘姚縣處士黃宗義卒

字太冲號梨洲

年八十四明天啓

中死璫禍御史諡忠端尊素子也以古文經學倡浙東海內推為耆宿翰林陳錫嘏范光陽仇兆鼇及陳亦衷董允璫萬斯大斯同輩皆出其門

陶隱居真靈位業圖予昔已指其謬秋日偶閱司馬子微所記洞天福地各有主者率荒唐謬悠最可笑者如

第三十勒溪在建州建陽縣東是孔子遺硯之所夫丹陽季子碑世且疑之如所言則孔子又嘗踰吳越遊閩粵乎道家之無稽如此令人噴飯

第六十一福地長在山在齊州長山縣毛真人治之按此山即長白山也志不載此名特著之

予嘗讀三峯藏禪師語錄及五宗原以為末法中龍象其提智證傳闡發臨濟汾陽三玄三要之旨而欲遠嗣法於寂音亦天童之諍子也而錢氏列朝詩謂餘分閏

位竟陵之詩與西國之教三峯之禪旁午發作並為孽
於斯世云云師與錢氏皆常熟人而詆譏如此豈別有
謂耶不可解也

按此乃斥謙益妄憑臆見
好為詆譏之非故存之

北苑山水卷首有宣和御筆董源夏山圖五字一中押
上鈐御璽小米題詩云崇山過新雨蒼翠濃欲滴林深
不通人谿迴有吟客日落古道青天空暮雲碧何處一
聲蟬幽棲仍自得紹興五年秋八月臣米友仁奉敕題
後有金粟道人七言古詩

元顧
阿瑛

一首巴西鄧文原次韻

一首虞集觀孟舉詹希元跋東海徐有貞閱長沙李
東陽跋已上題跋惟詹楷書餘並行草甚工
或云畫不甚稱
宣和御畫寫生翎毛圖荔支上白頭翁山鷓極生動末
有御筆一中押

貫休羅漢一卷後有元統新元四月佛誕日東海徐憲
元度七言古詩詩不甚工楊法沈周二跋法字伯防不
知何許人

戴文進畫竹一卷有鳳凰飛集其間當是應詔作

董文敏書白詩二首烏絲闌書雜行楷極工妙自跋云
盛唐人亦作達語如李嶠云富貴榮華能幾時山川滿
目淚沾衣不見祇今汾水上惟有年年秋雁飛頗足動
悟竟無僧氣予愛其語錄之又一卷雜臨宋四家書自
云用顏法亦妙

趙文敏泥金書佛說八人覺經一卷末題大德二年秋
八月松雪道人為中峯禪丈書并畫有大雅小印天水
郡圖書印

閻右相畫白馬馱經圖一卷寫摩騰竺法蘭像甚奇古
後有妙峯禪師福德跋書甚工又景泰元年陳鑑緝熙
跋按宣和御府所藏立本畫四十有一無馱經圖此圖
不知何據定為閻作有睢州袁氏家藏印

唐六如畫盤山秋靄圖一卷彭年孔嘉跋

峨嵋山有兩孫思邈一唐初人一宋人與張乖崖善見
山志第十八卷

吾郡歷城明翰林王公敕字雲芝成化甲辰進士及第

第三人諸生時讀書卧牛山寺夜見地有火光發之得石匣匣有書二冊讀之遂能御風出神知未來休咎生平異事甚多嘗與僧采枸杞山上僧先下扣門公已先在啟扁官河南四川督學試日諸生見鎖院廳廡各有一公危坐一日見白雲一片命騎追之雲落地化為石色如雪煮食之其甘如飴曰此雲母也行輝縣山中忽下輿拜曰丈乃在此令掘地得奇石置之百泉書院又於道左右垣中開視得紫石硯二枚各有鴛鴦一隻雌

雄相向嘗云地如竹節眼凡有異寶皆可見又采杞僧
臨終公問所欲曰欲富貴兼之公曰但堪作一藩王耳
朱書其背曰蜀王比王生第二子背上隱隱有書字尹
恭簡旣寢疾問之曰有大鶴入室飛旋已而颺去公之
神也果然官終南國子祭酒預知死期怛化時四城門
皆見公羽衣鶴氅而去如雲水道人鄉人於良鄉道中
遇鼓吹從南來視之乃公也王陽明素推服之張尚書
鶴鳴為作傳先贈司徒公生時大父方伯贈司徒公取

公名名之

范道人者德州人居衛河西琵琶村生於明嘉靖三十

年辛亥程工部正夫

先貞

以康熙庚戌見之年一百二十

歲矣起居如平時五官之用未嘗少衰平生不知服食

修養之術少貧不娶事母最孝謹入九子祠為香火道

人祠有祭田數畝躬耕而食何思何慮與人一無所忤

正夫贈以詩云頗聞愛日依慈母直數生平到肅皇業

做逍遙遊廣莫身餘渾沌屬中央淄川高念東

珩

侍郎

亦嘗訪之

程正夫工部噶布喇碗歌序云有客自燕至出其橐有
阿房宮磚硯一陸探微畫一古刺水十餘確玉毬一葛
巴刺碗一磚作蜜蠟色肌理瑩滑如玉厚三寸方可盈
尺最發墨陸探微六朝人畫茫茫然於日中彷彿可睹
是著色山水古刺水用錫確貯之上朱刻永樂二年熬
造確重二斤水八兩香氣酷烈玉毬如雞子大山水人
物樓閣舟船刻畫精妙內外凡四層疑是鬼工也噶刺

巴碗西僧頂骨所為以供佛者予按探微劉宋人好作古聖賢及諸佛菩薩像不聞畫山水恐傳謠耳

宣和畫譜載陸

畫十在道釋門

順治癸巳正月十八日夜大風東昌府恩縣祁村陂中冰忽卓立成山廣四丈高二丈許峯巒秀拔谿壑迴環一磴委蛇相屬遠近觀者日千人康熙壬子新城錦秋湖中亦有此異

康熙癸丑新城東南曹村有鳩數百食麥按宋廬陵孫

奕示兒編云月令於仲春言鷹化為鳩喜其能變不仁之心也王制言鳩化為鷹然後設罝羅周禮司裘注仲秋鳩化為鷹而月令於仲秋當言而不言者惡其變而之不仁也今食麥與蝗蜉蝣螽蟴無異鳩之不仁甚矣抑猶有鷹之心也夫

王節婦名桂德州人父會禮及笄適諸生韓承業承業卒七日絕水漿欲以身殉其母力勸之長齋淡食不御鹽醢如此者十餘年承業將葬節婦夜起辦嚴手作書

置几案題曰守志以鏡壓其上從容出至室外東隅以
蘆席藉地瞑目趺坐揮手謝家人戒勿譁須臾口鼻自
出三昧火焚焉異香氤氲經旬不散體如金鐵不壞有
蓮花承趺其席不熱取席下土以療疾無弗愈者其舅
韓紳為合葬於城東時萬歷戊子歲也

葉氏女亦德州人其父賣菜傭也女生而知書明麗若
神及笄富貴家競通媒妁女皆峻拒之但乞以女紅之
直侍養父母時注目天際如有所思一日晨起嚴妝飾

趨父母前禮拜若將遠離者詰之無語但頻視日景及
午忽入室闔戶跣趺西向坐手結三昧印舉體香如芳
蘭母心動入視之已化去久矣事在萬厯戊午年午月
午日午時程工部先貞作火蓮行午日行二篇紀其事
偏沅巡撫陞任漕運總督董安國疏言清浪衛田畝舊
額四百四十八頃每十畝科糧一石今全書開載係二
百四十六頃每五畝五分科糧一石在三十年未丈增
以前雖田畝暨科則不符而荒熟額糧四千四百八十

一石有奇適相符合故小民安於緘默耳迨三十年丈量遂復原額田四百四十八頃雖田畝既復原額而科則未經題改遂照五畝五分科算致有荒熟糧八千一百四十九石有奇原額之外竟增至三千六百六十七石有奇查該衛田畝既已復額其科則自應仍照萬厯年間起徵云云適湖廣總督吳璥亦以為請併下戶部議田畝既復原額相應照該督撫所題十畝科糧一石應減去熟糧一千一十八石有奇荒糧二千六百四十

八石有奇得

旨允行皇仁周浹徧及荒遐而督撫為民請命不憚再三入告不愧封疆大吏矣

復前總督河道于成龍官改銜右都御史兼兵部右侍郎

予于秋審見山西妖巫有以利刃加人腹咒之云能愈疾已而刃入腹病者腸出而死巫亦論抵此獄凡兩見亡不笑其愚且誕者偶看隋書張文詡傳文詡河東人

嘗有腰疾有醫自言善禁文詔令禁之遂為刃傷至於
頓伏牀枕因知山西舊傳此術官是邦者所宜令行禁
止亦仁政之一端也

起丁憂原任湖廣布政使線一信為江南安徽巡撫都

察院右副都御史

安徽巡撫
國佐卒於官

門人孫子未

勅翰林說曾於崑山徐司寇健菴處見

乾學

間立本畫胡笳十八拍圖每段褚河南書其上宋元以

來璽印題跋甚多惜不暇記

按宣和畫譜立本畫
四十有二無此圖

又云曾於朱氏見宋駙馬都尉張敦禮畫李愿歸盤谷圖每段有東坡書按敦禮哲宗之壻畫人物樹石倣顧陸劉松年之師也歿贈太師

夏珪雪江歸棹卷於浦溆曲岸間作麕眼短籬叢竹蒙茸雪屋數椽掩映林薄中極荒寒之趣

蕭照者濩澤人靖康中流入太行為盜一日掠得李唐檢其行囊止粉奩畫筆叩知其姓氏照雅聞唐名即棄賊隨唐南渡紹興中補迪功郎待詔畫院賜金帶此盜

之工畫者予向記盧循輩盜賊多工書皆可異也照本末見圖繪寶鑑第四卷

林靈素善畫墨竹湖州元妙觀有石刻一枝

韓侂胄善作水墨竹石所畫大葉琅玕自稱曰太師竹廉布字宣仲山陽人張邦昌之壻工山水尤善枯木叢

竹奇石學坡公青出於藍

已上皆載
圖繪寶鑑

宋僧智永成都人工小景長於傳摹宛然亂真唐智永以書名此以畫名

居易錄卷二十七